

Postdiplomski studij u Sarajevu znači bolji poslovi i više radnih mjesta

“Novi postdiplomski studiji iz poslovne administracije koji nudi Univerzitet u Sarajevu će omogućiti bolje poslovne prilike za BiH,” rekao je danas prvi zamjenik visokog predstavnika Donald Hays.

Ambasador Hays je jutros govorio na ceremoniji na Univerzitetu u Sarajevu povodom potpisivanja Memoranduma o razumjevanju između Univerziteta u Delaware-u i Sarajevu, te USAID-a. Prema tom sporazumu Sarajevska poslovna škola će zajedno sa Univerzitetom u Delaware-u ponuditi postdiplomski studij poslovne administracije.

Podsjećajući da “se rezultati u praksi ne mogu postići ukoliko se nema čvrstog uporišta u teoriji” ambasador Hays je također istakao važnu ulogu ovog postdiplomskog studija kao “sredstva kojim će se usavršiti napredni mladi stručnjaci koji su upoznati sa izazovima i očekivanjima globalnog tržišta” te sredstva “u kreiranju fundamentalnih promjena u poslovnoj kulturi u BiH”.

Potreba za takvom promjenom u poslovnoj kulturi naglašena je i tokom prošlogodišnje istrage Specijalnog revizora u javnim kompanijama u BiH kada se otkrilo da menadžeri posluju na principu “da ako neka aktivnost nije izričito označena kao nepoštena onda se može smatrati prihvatljivom”.

Ambasador Hays je istakao da se kod ovih postdiplomskih studija “radi o svojevrsnom opremanju bh. kompanija da se natječu na globalnom tržištu koje ne prašta neučinkovitost, te koje bogato nagrađuje konkurentnost, na tržištu koje na duže staze nagrađuje pošteno i dobro poslovanje u odnosu na

korupciju te da opremi BiH za tržište na kojem se BiH želi i treba natjecati. Ovaj postdiplomski studij će omogućiti takvu konkurentnost.”

Ovaj projekt je finansirao USAID u vrijednosti od 10 miliona dolara.